



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔԸ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՄԱՍԻՆ

Ընդունվել է 11.05.2020

- [ԳԼՈՒԽ 1 ԸՆԴՀԱՆՈՒՐ ԴՐՈՒՅԹՆԵՐ](#)
- [ԳԼՈՒԽ 2 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԸ ՀԱՅՅՄԱՆ ՆԵՐԿԱՅԱՑՆԵԼԸ](#)
- [ԳԼՈՒԽ 3 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՄՐՑԱՆԱԿԱԿԻՐ ԸՆՏՐՈՂ ՀԱՆՁՆԱԺՈՂՈՎՆԵՐԸ](#)
- [ԳԼՈՒԽ 4 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՇՆՈՐՀՈՒՄԸ ԵՎ ՀԱՆՁՆՈՒՄԸ](#)
- [ԳԼՈՒԽ 5 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՀԱՎԱՍՏԻՔՆԵՐԸ](#)
- [ԳԼՈՒԽ 6 ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՖԻՆԱՆՍԱՎՈՐՈՒՄԸ](#)
- [ԳԼՈՒԽ 7 ԵԶՐԱՓԱԿԻՉ ՄԱՍ ԵՎ ԱՆՑՈՒՄԱՅԻՆ ԴՐՈՒՅԹՆԵՐ](#)

ԳԼՈՒԽ 1

ԸՆԴՀԱՆՈՒՐ ԴՐՈՒՅԹՆԵՐ

Հոդված 1. Օրենքի կարգավորման առարկան

1. Սույն օրենքով սահմանվում են Հայաստանի Հանրապետության պետական մրցանակները, ինչպես նաև կարգավորվում են Հայաստանի Հանրապետության պետական մրցանակներ շնորհելու եւ հանձնելու հետ կապված հարաբերությունները:

Հոդված 2. Հայաստանի Հանրապետության պետական մրցանակների վերաբերյալ Հայաստանի Հանրապետության օրենսդրությունը

1. Հայաստանի Հանրապետության պետական մրցանակների հետ կապված հարաբերությունները կարգավորվում են սույն օրենքով եւ այլ իրավական ակտերով:

Հոդված 3. Հայաստանի Հանրապետության պետական մրցանակները

1. Հայաստանի Հանրապետության պետական մրցանակները սահմանվում են սույն հոդվածի 2-րդ մասում նշված բնագավառներում կատարված նախաձեռնությունները եւ գործունեության արդյունքները ճանաչելու, գնահատելու, խրախուսելու եւ խթանելու նպատակով:

2. Հայաստանի Հանրապետության պետական մրցանակներն են՝

- 1) գրականության եւ հրապարակախոսության ոլորտում Հայաստանի Հանրապետության պետական մրցանակ.
- 2) երաժշտության եւ կատարողական արվեստների ոլորտում Հայաստանի Հանրապետության պետական մրցանակ.
- 3) կերպարվեստի ոլորտում Հայաստանի Հանրապետության պետական մրցանակ.
- 4) թատերական արվեստի ոլորտում Հայաստանի Հանրապետության պետական մրցանակ.
- 5) կինոարվեստի ոլորտում Հայաստանի Հանրապետության պետական մրցանակ.
- 6) ճարտարապետության եւ քաղաքաշինության ոլորտում Հայաստանի Հանրապետության պետական մրցանակ.

- 7) ճշգրիտ եւ բնական գիտությունների ոլորտում Հայաստանի Հանրապետության պետական մրցանակ.
- 8) հումանիտար եւ հասարակական գիտությունների ոլորտում Հայաստանի Հանրապետության պետական մրցանակ.
- 9) աստղաֆիզիկայի, ինչպես նաեւ դրան հարակից՝ ֆիզիկայի, մաթեմատիկայի բնագավառներում Հայաստանի ազգային հերոս, ակադեմիկոս Վիկտոր Համբարձումյանի անվան միջազգային գիտական՝ Հայաստանի Հանրապետության պետական մրցանակ.
- 10) բարձր տեխնոլոգիաների ոլորտում համաշխարհային ներդրման համար Հայաստանի Հանրապետության պետական մրցանակ.
- 11) ֆիզիկական կուլտուրայի եւ սպորտի ոլորտում ձեռքբերման համար Հայաստանի Հանրապետության պետական մրցանակ:
3. Պետական մրցանակների շնորհման եւ հանձնման կարգը սահմանում է Կառավարությունը:
4. Կառավարությունն իրավասու է ընդունելու որոշում՝ մրցանակների այլ տեսակներ սահմանելու, դրանք շնորհելու եւ հանձնելու կարգի վերաբերյալ:

ԳԼՈՒԽ 2

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԸ ՀԱՅՏՄԱՆ ՆԵՐԿԱՅԱՑՆԵԼԸ

Հոդված 4. Ստեղծագործությունները, հայտնագործությունները (գյուտերը) եւ աշխատանքները մրցանակի ներկայացնելը

1. Նույն ստեղծագործությունը, հայտնագործությունը (գյուտը) եւ աշխատանքը մրցանակի կարող է ներկայացվել միայն մեկ անգամ:
2. Հայաստանի Հանրապետության պետական մրցանակի կարող են ներկայացվել միայն այն ստեղծագործությունները, հայտնագործությունները (գյուտերը), աշխատանքները եւ ձեռքբերումները, որոնք առաջին անգամ իրագործվել (հրատարակվել, հրապարակվել, կատարվել, ցուցադրվել, կառուցվել-ավարտվել, բեմադրվել եւ այլն) են գրականության, հրապարակախոսության եւ արվեստի, ճարտարապետության եւ քաղաքաշինության, ճշգրիտ եւ բնական գիտությունների, հումանիտար եւ հասարակական գիտությունների, աստղաֆիզիկայի, ինչպես նաեւ դրան հարակից՝ ֆիզիկայի, մաթեմատիկայի բնագավառներում, ֆիզիկական կուլտուրայի եւ սպորտի ոլորտում մրցանակի հայցման առաջարկությունները ներկայացնելու ժամկետն ավարտվելու օրվան նախորդող երեք տարվա ընթացքում:
3. Գրականության եւ հրապարակախոսության, երաժշտության եւ կատարողական արվեստների, կերպարվեստի, թատերական արվեստի, կինոարվեստի, ճարտարապետության եւ քաղաքաշինության, ֆիզիկական կուլտուրայի եւ սպորտի ոլորտների աշխատանքները մրցանակի հայցման համար կարող են ներկայացնել հեղինակները, կրթության, գիտության, մշակույթի եւ սպորտի նախարարությունը, ստեղծագործական միավորումները, ինչպես նաեւ այն կազմակերպությունները, որոնց կանոնադրական նպատակներն ու խնդիրները ներառում են նշված ոլորտները, եւ որոնք պետական գրանցման օրվանից առնվազն երեք տարի ծավալել են համապատասխան գործունեություն:
4. Ճշգրիտ եւ բնական գիտությունների, հումանիտար եւ հասարակական գիտությունների ոլորտներում հայտնագործությունները (գյուտերը) եւ աշխատանքները մրցանակի հայցման համար կարող են ներկայացնել հեղինակները, կրթության, գիտության, մշակույթի եւ սպորտի նախարարությունը, Հայաստանի Հանրապետության գիտությունների ազգային ակադեմիայի նախագահությունը, բաժանմունքները, գիտական կամ գիտատեխնիկական կազմակերպությունը, պետական եւ հավատարմագրված ոչ պետական բուհերի գիտական խորհուրդները, բացառությամբ սույն հոդվածի 5-րդ մասով սահմանված դեպքի:
5. Հայաստանի ազգային հերոս, ակադեմիկոս Վիկտոր Համբարձումյանի անվան միջազգային գիտական մրցանակի հայցման համար աշխատանքների առաջադրման իրավունք է վերապահվում՝
- 1) ֆիզիկայի բնագավառում՝ Նոբելյան մրցանակի դափնեկիրներին.
- 2) Հայաստանի Հանրապետության գիտությունների ազգային ակադեմիայի նախագահությանը.

- 3) ակադեմիկոս Վիկտոր Համբարձումյանի անվան Բյուրականի աստղադիտարանի գիտական խորհրդին.
- 4) Երեւանի պետական համալսարանի ֆիզիկայի ֆակուլտետի ակադեմիկոս Վիկտոր Համբարձումյանի անվան ընդհանուր ֆիզիկայի եւ աստղաֆիզիկայի ամբիոնին:
6. Բարձր տեխնոլոգիաների ոլորտի աշխատանքները պետական մրցանակի հայցման համար կարող են ներկայացնել հեղինակը եւ բարձր տեխնոլոգիական արդյունաբերության նախարարությունը:
7. Ստեղծագործությունները, հայտնագործությունները (գյուտերը) եւ աշխատանքները պետական մրցանակի հայցման ներկայացնելու կարգը սահմանում է Կառավարությունը:

ԳԼՈՒԽ 3

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ՄՐՑԱՆԱԿՆԵՐԻ ՄՐՑԱՆԱԿԱԿԻՐ ԸՆՏՐՈՂ ՀԱՆՁՆԱԺՈՂՈՎՆԵՐԸ

Հոդված 5. Հայաստանի Հանրապետության պետական մրցանակների հավակնորդների ընտրությունը

1. Հայաստանի Հանրապետության պետական մրցանակները շնորհվում են լավագույն ստեղծագործությունների, հայտնագործությունների (գյուտերի) եւ աշխատանքների հեղինակներին, ինչպես նաեւ ֆիզիկական կուլտուրայի եւ սպորտի եւ բարձր տեխնոլոգիաների ոլորտներում աշխատանքներ կատարած կամ նշանակալից ձեռքբերումներ ունեցած անձանց:
2. Հայաստանի Հանրապետության պետական մրցանակի հայցման ներկայացված ստեղծագործությունները, հայտնագործությունները (գյուտերը) եւ աշխատանքները քննարկում, մրցանակի հավակնորդների ընտրությունը կազմակերպում եւ անցկացնում են Հայաստանի Հանրապետության պետական մրցանակների մրցանակակիր ընտրող հանձնաժողովները (այսուհետ՝ հանձնաժողովներ), որոնք ձեւավորվում են առանձին՝ ըստ սույն օրենքի 4-րդ հոդվածի 2-րդ մասով սահմանված ոլորտների:
3. Բարձր տեխնոլոգիաների ոլորտում համաշխարհային ներդրման համար պետական մրցանակի թեկնածուների հավակնորդների ընտրությունն իրականացնում է մրցանակաբաշխության կոմիտեն:
4. Մրցանակների հավակնորդների ընտրությունն իրականացվում է՝ հիմք ընդունելով ստեղծագործությունների, հայտնագործությունների (գյուտերի) եւ աշխատանքների արժեքավորությունը, նշանակությունը տվյալ ոլորտի զարգացման համար եւ այլ չափանիշներ, որոնք սահմանում են հանձնաժողովները կամ մրցանակաբաշխության կոմիտեն:
5. Մրցանակների հավակնորդների ընտրության արդյունքները չեն կարող բողոքարկվել:

Հոդված 6. Հանձնաժողովների եւ մրցանակաբաշխության կոմիտեի գործունեության սկզբունքները

1. Հանձնաժողովները եւ մրցանակաբաշխության կոմիտեն գործում են օբյեկտիվության, անաչառության, թափանցիկության եւ կոլեգիալության սկզբունքների հիման վրա:

Հոդված 7. Հանձնաժողովների եւ մրցանակաբաշխության կոմիտեի ձեւավորման կարգը

1. Հանձնաժողովներից յուրաքանչյուրը բաղկացած է նախագահից եւ անդամներից, որոնք հանձնաժողովների կազմում ընդգրկվում են իրենց համաձայնությամբ եւ իրենց պարտականությունները կատարում են հասարակական հիմունքներով:
2. Հանձնաժողովների կազմում ընդգրկվում են՝
- 1) երկու անդամ՝ առաջադրված այն հասարակական կազմակերպությունների կողմից, որոնց կանոնադրական նպատակները եւ խնդիրները ներառում են համապատասխան ոլորտները, եւ որոնք պետական գրանցման օրվանից առնվազն երեք տարի ծավալել են համապատասխան գործունեություն.
- 2) երկու անդամ՝ առաջադրված համապատասխան ոլորտում Կառավարության քաղաքականությունը մշակող եւ իրականացնող նախարարության կողմից.
- 3) երեք անդամ՝ համապատասխան ոլորտում ավանդ ունեցած հեղինակավոր մասնագետներից, որոնց առաջադրում է Կառավարության քաղաքականությունը մշակող եւ իրականացնող նախարարությունը.